

Mersad ef. Krešić
Islamski centar Zagreb
Hutba: 27.01.2012./04.03.1433.h.
Tema: Važnost Rebiu-l-evvela

Hvala Allahu dž.š. Gospodaru svih svjetova, neka je hvala Allahu koji nas je učinio sljedbenicima Muhammeda a.s. i počastio nas Islamom.

Neka je salavat i selam na posljednjeg Božjeg poslanika Muhammeda a.s. i na sve njegove ashabe.

Draga braćo i sestre!

Nastupio je mjesec rebiu-l-evvel, mjesec u kojem je rođen posljednji Allahov Poslanik, Muhammed El-Emin.

Rebiul-evvel je treći mjesec u hidžretskom kalendaru. Za većinu muslimana poseban je 12. dan u ovom mjesecu jer se tog dana rodio posljednji Allahov poslanik Muhammed s.a.v.s. 571. godine u Mekki.

Za muslimane širom svijeta ovaj događaj ima nemjerljivu vrijednost koje su neki svjesni, a neki nažalost nisu. Oni koji slijede svog Poslanika znaju da je on bio i ostao nezamjenljiv uzor koji se u svemu slijedi. Slijedenje Poslanika a.s., ne prestaje niti slabi iako je od njegove smrti prošlo 1380 godina, dok s druge strane, mnoge poznate i čuvene ličnosti padnu u zaborav čim se nad njima zemlja slegne.

Brojni su primjeri ljudi koji su htjeli izgraditi kult ličnosti kako bi ih ostali poštovali, slijedili, strepili od njih, pa čak im se klanjali, te su još za svog života dizali sebi spomenike ne bi li uspomena na njih duže trajala.

Jedina osoba kroz povijest koja se uspjela nametnuti i koja se slijedi isključivo iz ljubavi, jeste Muhammed s.a.v.s.

Jedina osoba koja se slijedi u svemu što naređuje i zabranjuje, jedina osoba koja nije imala nikakvih slika ni kipova, a sjećanje na njega živi svaki dan putem spominjanja njegovog imena i donošenja salavata jeste Muhammed s.a.v.s.

Jedina osoba na svijetu za koju se prenosi da je vladala ljubavlju, jedina osoba koju su njeni suvremenici tj. ashabi voljeli više i od svega drugog pa čak i od sebe samih.

Voljeli su ga više nego što je žedni volio u pustinji pronaći hladnu pitku vodu. Voljeli su ga toliko da su mogli prihvatiti sve izgubiti, ali ne i njega.

Jedino je Muhammed a.s., bio uzor koji se mogao u svemu slijediti i to je upravo jedna od najvećih prednosti islama nad ostalim religijama.

Uz to što je na 12. rebiul-evvel rođen Muhammed a.s. te je na taj dan došao u Medinu okončavši tako hidžru, 12. rebiul-evvel je i dan njegova preseljenja na ahiret.

Taj je datum zasigurno značajan za cjelokupnu svjetsku povijest. Poslanikovo, a.s., rođenje, zatim njegova hidžra iz Meke u Medinu i njegovo preseljenje obilježili su nova poglavlja u svjetskoj, a posebno u povijesti islama.

U godini u kojoj je rođen posljednji Poslanik, dogodilo se čudo, koje je podsjetilo ljude da je došlo vrijeme njegova dolaska, a samim time i rušenja tvrđava zla, nasilja, širka i kufra.

U toj godini je, nasilni vladar Habeše, po imenu Ebreha, odlučio srušiti Ka'bu. Šejtan mu je uljepšavši tu namjeru i rekao: *"Ti si jak i imaš snažnu vojsku. Arapi su nomadi koji nemaju ništa od toga. Idi i sruši Ka'bu i niko ti se u tome neće moći suprotstaviti."* On, usiljeni Ebreha, pripremi slonove i vojsku.

Kada se primakao Mekki, njeni stanovnici su pobjegli na brda, ostavljajući Ka'bu i svoje kuće bez čuvara. U tome je upravo i mu'džiza, jer da su se stanovnici Mekke suprotstavili Ebrehi i da je bio poražen, svi bi kazali da je to njihovom zaslugom i hrabrošću. Pa čak da je ostao i jedan čuvar, o njemu bi se pričale legende.

Ali, Allahova dž.š., odredba je bila da Ka'ba ostane sama i bez ljudske zaštite. Kada se Ebreha našao naspram Ka'be koju nitko od ljudi nije štiti, dogodila se mu'džiza: nebo prekriše male ptice, koje su bacajući kamenčiće razbile Ebrehinu vojsku.

O tome govori Sura El-Fil: **„Zar nisi čuo što je sa vlasnicima slona Gospodar tvoj uradio! Zar lukavstvo njihovo nije omeo? I protiv njih jata ptica poslao, koje su na njih grumenje od gline pečene bacale, pa ih On kao lišće koje su crvi istočili učinio!"** (El-Fil, 1-5)

Naš Poslanik je pun života, on je prije svega ‚Abdullah‘ Allahov sluga, čovjek koji se smije, nasmijava ostale i unosi optimizam u srca vjernika.

Kada su ashabi jeli hurme bacivši koštice pred hazreti Alija r.a., pa mu Poslanik dobaci šaleći se: ‚Koliko li si ti hurmi pojeo Ali?‘ Ali r.a., pogleda te vidje da

kod ostalih nema koštica, pa reče: “Ja sam jeo samo hurme, a ostali su izgleda i koštice pojeli.“

Slanje Muhameda a.s., najveća je milost i blagodat Gospodara svjetova. On, kao dostavljač Allahove riječi i upute, uzor je ljudima u svim segmentima života. Zato je poznavanje Poslanikovog životopisa od izuzetne važnosti za svakog čovjeka: - za muslimane zbog toga što ne mogu biti pravi vjernici osim ako se ugledaju u Poslanika i njegov život, - a za nemuslimane zbog toga što bi trebali, prije konačnog suda o Muhammedu a.s., i njegovoj misiji, upoznati njegov život i djelo.

Allah ga je poslao nakon što je neko vrijeme bilo prekinuto slanje poslanika, a narodi bijahu dugo u drijemežu. Svjetionik upute bio je iščeznuo, a pojavili su se znaci propasti. Svijet ovaj bio je neprijatan sljedbenicima svojim i mrgodio se u lice tražitelju svome. Plodovi njegovi bijahu iskušenja, a hrana njegova lešina.

On ga je poslao s dokazom dovoljnim, s govorom i pozivom uvjerljivim koji uređuje.

Muslimani u cijelome svijetu dočekuju Mevlud, rođenje posljednjeg Božjeg poslanika Muhammeda, a.s., kao milost i blagodat koja snaži njihov duh, vjeru i nadu, naročito sada kada se suočavamo sa moralnim posrnućem ljudske savjesti i kad se skrnavi svako ljudsko dostojanstvo.

Još od davnina postoji običaj kod svih zajednica da svečano obilježavaju značajne datume iz svoje prošlosti kao što su rođenje velikana koji su svojim životom i djelom imali presudan utjecaj na njihovu prošlost i budućnost.

Oživljavajući uspomenu na njih, te zajednice, ustvari, iskazuju zahvalnost, poštovanje i divljenje tim ljudima i istovremeno izražavaju spremnost u nastavljanju njihovog djela.

Muslimani cijelog svijeta, dolazak Allahovog Poslanika smatraju najvećom Allahovom dž.š. milošću ljudima (VE MA ERSELNAKE ILLA RAHMETEN LIL ALEMIN – Mi smo te poslali, zaista, samo kao milost svjetovima).

Stoga njegovo rađanje obilježavaju na način primjeren njemu i učenju koje je od Allaha dž.š. priopćio čovječanstvu.

Svečano obilježavanje dana rođenja Muhammeda a.s. ne spada u ibadete kakvi su npr. namaz, post, zekat ili hadž. Ni sam dan rođenja nije blagdan kao što su Ramazanski ili Kurban bajram, ali obilježavanje ovoga dana je lijepa tradicija,

kao najobičniji način iskazivanja ljubavi i poštovanja prema velikom Poslaniku, njegovom životu i djelu.

Ovaj stav je utemeljen na hadisima Muhammeda a.s., koji je rekao: „Tko uvede u praksu jedan lijep običaj, pripada mu nagrada za to i nagrada onoga tko po njemu postupa... A tko, opet, uvede u praksu ružan običaj, pripada mu za to kazna, kao i kazna onoga tko po njemu postupa.”

Pa tako i u našem Centru, povodom rođenja Muhammeda a.s. na dan 12. rebiul evvela koji nastupa u slijedeći petak sa akšam namazom, isto se priređuju posebni programi pod nazivom "Dani mevluda i zikra" kako bi obilježili ovaj dan. Već danas na hutbi u Karlovcu naš glavni imam govori na temu Mevlud Muhammeda a.s

Sutra navečer poslije jacije namaza predavanje na temu: „Koliko volimo i slijedimo Muhammeda a.s." će održati glavni sisački imam Alem ef. Crnković u dvorani h. Salim Šabić.

U četvrtak navečer, u sklopu tribine Dr. Sulejman Mašović poslije jacije namaza održat će se sohbet o Poslaniku sa predavanjem glavnog zagrebačkog imama, učenja Kur'ana, zikra i mevludskih spjevova.

A u slijedeći petak navečer, poslije jacije namaza, na sami 12. rebiul-evvel će se proučiti Mevlud-i šerif uz sadržajno predavanje glavnog imama MIZ Kakanj mr. Sulejmana ef. Čelikovića kada će nastupiti i muški zbor "Ak Saray"

Zaista, ovakvim sadržajem, malo koji centar se može pohvaliti, pa vas zato sve pozivam da svojim prisustvom zahvalimo Allahu dž.š. što je baš nas odabrao da budemo sljedbenici Muhammeda a.s., koji će se zagovarati za nas na Sudnjem danu, a posebno vas pozivam da u što većem broju dođemo u slijedeći petak navečer na mevlud, sa svojim obiteljima i svojom djecom.

Da bi dan poslije toga, u subotu 04.02.bilo organizirano druženje za omladinu uz ilahije i kaside povodom rođendana Muhammeda a.s.

Molim Allaha dž.š. da nam olakša obilježavanje Dana mevluda i da bude sa nama zadovoljan! AMIN

Ella inne ahsenel kelami....